

心變、心垢則境濁、心逐境移、境閑則心朗、心境冥會、道德玄存、至如能寂常居以利見、妙祥鎮住以接引、提山垂迹、孤岸津梁並皆靡不依仁山託智水、臺鏡瑩磨、俯應機水者也。有沙門勝道者、下野芳賀人也、俗姓若田氏、神邈救蟻之齡、意清惜囊之齒、桎枷四民之生事、調飢三諦之滅業、厭聚落之轟轟、仰林泉之皓然、粵有同州補陀洛山、葱嶺插銀漢、白峯衝碧落、磽雷腹而鼉吼、翔鳳足而羊角、魑魅罕通、人蹊也絕、借問振古未有攀躋者、法師顧義成而興歎、仰勇猛以策意、遂以去神護景雲元年四月上旬跋上、雪深巖峻、雲霧雷迷、不能上也、還住半腹三七日而却還、又天應元年四月上旬、更事攀陟、亦上不得也、二年三月中、奉爲諸神祇寫經圖佛、裂裳裹足、棄命殉道、撻負經像、至于山麓、讀經禮佛、一七日夜、堅發誓曰、若使神明有知、願察我心、我所圖寫、經及像等、當至山頂爲神供養、以崇神威、饒群生福、仰願善神加威、毒龍卷霧、山魅前導、助果我願、我若不到山頂、亦不至菩提、如是發願訖、跨白雪鰐々、攀綠葉之璀璨、腳踏一半、身疲力竭、憩息信宿、終見其頂、悅惚々々似夢似寤、不因乘查、忽入雲漢、不嘗妙藥、得見神窟、一喜一悲、心魂難持、山之爲狀也、東西龍臥、彌望無極、南北虎踞、接息有興、指妙高以爲儔、引輪鐵而作帶、笑衡岱之猶卑、哂崑崙之又劣、日出先明、月來晚入、不假天眼、萬里目前、何更乘鵠、白雲足下、千般錦華、無機常織、百種靈物、誰人陶冶、北望則有湖、約計一百頃、東西狹、南北長、西顧亦有一小湖、合有二十餘頃、炳坤更有一大湖、累計一千餘町、東西不闊、南北長遠、四面高峰倒影水中、百種異莊、木石自有、銀雪敷地、金華發枝、池鏡無私、萬色誰逃、山水相映、乍看絕腸、瞻佇未飽、風雪趁人、我結蠅菴于其坤角、住之禮懶、勤經三七日已遂斯願、便歸故居、去延曆三年三月下旬、更上經五箇日、至彼南湖邊、四月上旬、造得一小船、長二丈、廣三尺、卽與二三子棹湖遊覽、遍眺四壁、神麗夥多、東看西看、汎濫自逸、日暮興餘、強託南洲、其洲則去陸三十丈餘、方圓三十丈餘、諸洲之中、美華富焉、復更遊西湖、去東湖十五許里、又覽北湖、去南湖三十許里、並雖盡美、總不如南、其南湖則碧水澄鏡、深不可測、千年松栢、臨水而傾、綠蓋百圍、檜杉竦巖而構、紺樓五彩之華、一株而雜色、六